

nus ad eos mitteret, qui uti se dederent postularet, ne recusarent. Cumque Taurisani tumultu civitatis & plebis excitato, plerisque non idem sentientibus, per legatos, quid se vellent Patres facere, a Senatu petiissent: id unum quod conducere sibi ipsi existimarent, legatis responderunt. Scripsere etiam ad suos in Carnis atque Istris magistratus, ut quæ oppida superiore anno e Maximiliani ditione respublica ceperat, ea omnia, armamentis commeatibusque publicis abductis, regiis petentibus ministris restituerent. Postremo, quod ab ea cogitatione non longissime aberant, ut urbi quoque ipsi timendum putarent, docti a præsentibus rebus, quantam reipublicæ diuturnitas & incrementum in se unos omnium regum invidiam atque odium concitavisset, Decemviri duodecim legerunt cives dignitate præditos, qui vada urbana atque litora, adhibitis ejus rei peritis hominibus, diligenter inspicerent, ut aditus, si qui essent apertiores, castellis munirentur. Tum auctis operarum publicarum numerus: jussumque ut omnes insulas & domos vicorum magistri perlustrarent, quantaque esset in urbe advenarum multitudo, quanta armorum privatim ab his comparatio, cognoscerent: editumque pœna capitis propositum, ne quis armatus incederet. vigiliæque noctu vicatim & præfecti cum militibus dispositi, ne quis temere tumultus exoriri posset. etiam lex lata, ut triremes octo urbis præsidio armarentur. missusque multo maximus frumenti numerus ab annonæ magistratu ad molas farinarias in Taurisanos fines domi molitus adservandus, ne, si eæ ab hostibus molæ interciperentur, civitas farinæ inopia laboraret. molæque aliquot, quas naves sustinebant, e Pado Athesique ad urbem perductæ: cogitatumque ut molæ aliæ, quas vertere ventus quiret, in suburbanis insulis fabricarentur: puteique per plures in portus litore foderentur, ut si a fluminibus aqua propter hostes circumfusos peti non posset, iis puteis civitas uteretur. Missi etiam publice lecti cives ad arborem in Medoaci ripis cædendam, atque ad urbem devehendam, ut materia civibus ad munitiones in propugnatione sup-

*Senatus ur-
bis securita-
ti prospicit.*